



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Oe-cusse
22 Abril 2015

Julgamentu kolektivu ba krime violénsia bazeia ba jéneru iha Tribunál Distritál Oe-cusse

Iha 14 to'o 17 Abril 2015, Tribunál Distritál Oe-cusse realiza julgamentu ba krime kolektivu ho natureza violénsia bazeia ba jéneru, iha Distritu Oe-cusse.

Bazeia ba orariu julgamentu krime kolektivu semana dahuluk, hahú iha 13 to'o 17 Abril 2015, JSMP konsege monitoriza kazu 6 ne'ebé tribunál julga hahú loron daruak hosi semana kolektivu dahuluk nian. Tuir planu julgamentu kolektivu semana daruak nian sei hahu fali hosi 20 to'o 24 Abril 2015.

Iha loron haat semana dahuluk nian, tribunál julga krime maus tratus ba kónjuje 3, tentativa violasaun seksuál 1, koasaun seksuál 1 no halo adiamentu alterasaun ba krime interrupsaun ba gravides 1.

Entre kazu hirak ne'e, husi krime maus tratus ba kónjuje 3 no tentativa violasaun seksuál 1, tribunál marka leitura akordaun ba iha 27 Abril 2015 no ba krime koasaun seksuál leitura akordaun sei halo iha 28 Abril 2015.

“JSMP apresia esforsu tribunál, maneija tempu atu julga kazu krime kolektivu sira ne'ebé rejistu ona iha tribunál refere. Julgamentu ne'e importante tanba bele hatan ba ezijsensia parte sira ne'ebé hein hela justisa ba sira nia kazu,” dehan Luis de Oliveira Sampaio, Diretór Ezekutivu JSMP.

Iha julgamentu ne'e, tribunál adia julgamentu ba kazu krime interrupsaun ba gravides, no altera akuzasaun husi artigu 141 alinea 1 hosi kompozisaun kolektivu ba fali artigu 141 alinea 2 Kódigu Penál ne'ebé sei prejide husi juis singular. Julgamentu ne'e marka fali ba iha 11 Maiu 2015. Anunsia ba alterasaun no adiamentu ne'e halo tanba arguida la marka prezensa. Tribunál fixa pena multa ba arguida US\$ 20.00 no sei halo detensaun ba arguida atu partisipa iha julgamentu.

JSMP observa katak kazu 5 ne'ebé tribunál julga ona, maioria rejistu iha tinan 2014 no so kazu krime interrupsaun ba gravides mak rejistu iha tribunál iha tinan 2010.

JSMP enkoraja tribunál atu aplika sentensa ba arguidu sira ho devér adisionál atu nune'e bele kontribui prevene krime ho natureza violénsia bazeia ba jéneru ho krime violénsia doméstika iha comunidade. Tuir observasaun JSMP nian katak krime ne'e, número a'as iha jurisdisaun tribunál Oe-cusse.

Julgamentu ne'e przjide husi Dr. João Ribeiro juis administradór Tribunál Distritál Oe-cusse. Juis nain rua husi Tribunál Distritál Dili ba kompleta koletivu, Dra. Zumiaty Freitas no Dra. Francisca Cabral. Ministériu Públiku representa husi Dr. Ambrogio Rangel Freitas no arguidu sira akompaña husi Dr. Calisto Tout no Dr. Afonso Gomes Fatima husi Defensória Públiku Oe-cusse.

Atu hetan informasaun liutan favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

